

四庫全書

集部

欽定四庫全書

集部

青霞集卷

五

詳校官庶吉士臣柳邁祖

中書臣劉源溥覆勘

總校官編修臣倉聖脉

校對官檢討臣王汝嘉

謄錄監生臣鄧以伊

欽定四庫全書

青霞集卷五

明 沈鍊 撰

歌

題東方朔圖

我即是東方朔王母蟠桃手曾摘三千年開花結實不
為遲銀箭壺中方一刻黃金白玉夢境迷世間那有偷
桃客

偶成

淮陰小兒欺韓信跨出市中不自禁須臾西馳謁相公
築壇拜將生威風千金相召輕薄子膝行蒲伏驚欲死
昔何倨傲今何恭將軍顏色非不同世態悠悠久自知
天下多少淮陰兒

長相思

思君祇欲見君面君在天涯那得見可恨東風入畫堂
捲簾惟有雙飛燕愁雲漠漠畫不開孤月娟娟夜長怨

日暮無端飛雪霰消落梅花不盈片對此長題尺素書
何因得借春鴻便

題鷺山小像

嗟余本是茹芝客見君芳華婉若蘭石交非因斗酒結
寸心那用尺書彈意氣相歡綰雲霧白日奉以朱絃彈
知音會賞陽春曲寡鵠誰舒萬里翰知君四海意相鄰
見君畫像情亦親綰素披觀本遊戲丹青貌出猶風神
龍章鳳姿意天矯虎頭燕頤生殊倫長康正喜傳瞳子

元亮何妨項葛中詎憐風骨比雲霞自羨高才盛五車
手校六經心獨醉神遊八極氣偏賒更將餘事工詞翰
猶使聲名冠永嘉長握明珠歸合浦恨持寶劍隔張華
人生窮達豈能期弦望從來自有時伏櫪應知心不已
封侯那得數偏奇獻策十回曾遇合揚鑣九折在驅馳
莫信今日書生相麟閣圖形未可知

送張玉亭慮囚淮陽

今代張衡屬省郎三年粉署盛輝光入曹永日花侵篆

劍佩飄搖坐未央
晝習文書承禁漏
夜開墳典炷名香
寶刀久久生星宿
綵筆時時詠鳳凰
既逢鵷鷺承清切
復道芝蘭比芳潔
草書寫罷落飛雲
奇畫題成舞流雪
聲華世重爲八龍
藝苑人稱讓三絕
當世誰先鄭廣文
生前恐是王摩詰
方傳麗藻盛西京
又秉旌麾出鳳城
使節從來天上發
公車疑自日邊行
將垂訊伐先揚命
欲效馳驅敢問程
滿月漸隨征蓋去
海雲正逐鼓鼙生
競識諸卿車馬過
共臨祖道振鳴珂
十行布席花如錦

百處傾壺酒似河誰羨陽阿為楚舞必宣大雅入驪歌
郎官出按征夫盛才子將行送者多嗟余本是同鄉郡
蜿蜒山河心彌近十年為宰世所嗤累日驅車獨相問
人生所貴心相知斗酒綢繆永投分臨歧不必嘆分飛
赤霄羽翮時能奮

送張甌江符卿

張公子佩玉環意氣凌雲體自閒玉環連蜷若明月盈
盈三五無虧缺衣邊結響勝鳴璫劍裏回容輕佩玦半

面初辭鉤弋宮全身正奉咸陽闕婉婉規中度悠悠象
外懸玉以銘文德環以喻周旋丈夫纓組橫九州心似
明珠爛不收璇璣斗宿光常滿鍾鼎江河意欲流九蓬
遼叟乘風轉韋約西門繞指柔非是馳情懷尺璧直因
托意在千秋

送呂子出遊宣大

呂子生來有奇氣結髮讀書恒念邊千金覓劍星文動
百金買馬生骨全陰符一卷手自注關山片月心常懸

五陵豪傑盡傾蓋談笑驚座如流泉竭來仗策遊燕京
黃閣鉅公知姓名吐哺走迎談世務指揮如意煙雲生
抵掌伊吾坐揮霍出門擁盾思河朔夢想龍沙白骨迴
黃塵萬里難遙度慷慨登塗若舊遊風沙颯颯近邊秋
弦歌不似聽刁斗飲酒心思血敵酋誰羨今宵意氣雄
明朝走馬學飛鴻隴邊弱草疑天外塞上閒花隔世中
朔漠懸心雲半黑長安迴首日偏紅羽檄曾傳鐵騎多
胡沙連箭入黃河將軍盡日愁披甲戰士經春出荷戈

曹郎度支籌不足指大憂懸在心腹樞臣按籍欲徵兵
天子宵衣願推轂自識中朝有申甫詎言四海無頗牧
余亦滄江學劍人十年為吏在風塵請纓自羨凌雲客
投筆曾無出塞辰聞君將發意婉婉手握軍書夜舒卷
非是羌戎善騎兵自因邊塞無關鍵道勝魚龍或可馴
令深虎豹猶堪偃奇功正好斬樓蘭名馬行能徵大宛
人將筆硯薄書生世以麒麟驅赤坂去去雙旌已及秋
行行六轡母今晚男兒會自策勲名詎識不為班定遠

古樂府

聖人出

聖人出應運期黃河水清丹鳳儀五星連珠光聚奎鐵
樹璀璨花紛披五雲扶日中天垂山谷發祥金陸離陰
叅不待陽管吹龍蛇大矯熙盛時熙盛時聖道昌手育
黎庶登泰康仁聲義聞八表揚奸軌震疊潛消藏金石
絲竹調文章聖人出禮樂興橐弓矢陳六經

上之回

上之回馭六龍雲霞布日當中敬日躋予心惘展德澤
揚仁風穆以愉麗寰區露為馬雷為車林有鳥河無魚
憂與樂惟所須光旦旦玉燭爛常明明禮樂燦上之回
所中閨靡出入亘九垓

戰城南

戰城南傷乎悲將軍隻手安可支豺虎當路人饑疲雖
則饑疲朝廷恩安可虧海宇茫茫誰惟思我為忠臣人
不知忠臣死時心轉足力盡筋衰堪瞑目聲名非是身

外傳人心動處神靈宣光明可以耀日月九原何處非
青天血肉之軀何足憐捫心念之安得眠

長門怨

玉殿疑天上珠鈿在鏡中怨多偏望月恩斷不隨風細
草留承輦飛花送出宮君心倘回轉妾貌尚丰容

天馬歌

天馬權奇稟靈骨橫空萬里思超忽赤驃本是房星精
飲水由來經月窟天馬嘶鳴心膽雄山驚虎豹海躍龍

吸風噓霧不受秣意氣常欲吞溟濛天馬復天馬獨立
襄陵野過都歷塊安足為世間未有齊驅者

筌篲引

公乎公乎聽我言河流洶湧波瀾翻斂身收足莫西渡
渡河而死誰煩冤河流何太濁發源高山邊山崩川竭
等閒事渡河死者真狂顛

青草歌

草青青兮春意多牛羊下兮思若何哀薄世兮涕滂沱

壯士憤兮摧江河雨不澤兮風不波年歲逝兮成蹉跎
望夷門兮日來過嘗有客兮居山阿

天涯曲

來牛去馬運方興兮天涯草昧誰平定兮盡節盡忠臣
道貞兮一匡天下垂令名兮時哉難得秉元精兮

邯鄲少年行

邯鄲城中俠少年從來意氣凌雲烟拂拭琴樽擬文士
飄揚劍珮比神仙交遊洛下三千客詎念城南二頃田

心知象緯時常玩手展龍韜夜自研曾習春秋魚麗陣
兼通風后握機篇未能報國心先許不過輕生意已捐
黃金祇為酬知己赤驥將來獵酒泉席上弦歌教出塞
室中圖畫盡三邊鳴笳每憤邊戎入折戟常輕漢將權
安得一懸金印出長驅萬里勒燕然

報國吟

長安近兮我所思決壯猷兮日孜孜龍有翼兮鳳有文
驥悲鳴兮思其羣世路隘兮誰當闢撫長劍兮凌青雲

火然曲

火光煌煌從中起烟塵直達重營裏
班超奮臂鄙善愁誰令定遠不封侯

將進酒

將進酒一飲十鍾未停手豪華倜儻傲公卿
酣歌擊筑衝牛斗我不是高陽舊酒徒亦不肯買醉黃公壚
劉毅家無卓椎地何用袒跣而呼盧
仲尼大聖飲酒無量哺糟六籍生風雲
醉裏乾坤何曠蕩玉壺金爵雅容禮樂

門牆桃李發陽春道上魚龍起澆滸正君臣序父子萬
世人心原不死絃歌一曲雅鄭分五色文章辨朱紫世
人皆醉我獨醒醉醒詎在樽壘裏君不見董卓專權築
郿塢黃金積多賤於土王允潛謀結布兒一朝事成如
縛虎又不見寵臣祿山入帝闈九齡識相輸忠言直至
天子幸蜀後方有詔令思文園又不見韓家亭榭連天
起賓寮獻納如流水宵分秘計出內庭虎臣拉殺輕如
鬼眼中富貴如春夢萬古綱常華岳重折腰俛眉事權

貴不如美酒當筵送

劉生

劉生尚遊俠結束似從軍
綠酒通宵飲黃金對客分
驅車遊五岳秉燭讀三墳
惟有不平氣時時干白雲

出自薊北門行

高秋宛馬肥鐵騎犯邊陲
披甲挽弓矢大半漢中兒
擾田擁雙騎攻堡挾長錐
揚言今歲入定欲寇京畿
將軍既傳檄士卒亦聞知
李牧急救保從古有良規
然聞仁

義士救患不踰時禦強能設險以寡在懸奇亦言將帥
勇不憂行伍疲孫武教宮嬪一朝能死綏何為坐偃蹇
終歲不出師寶劍匣中泣無乃久精思

君子有所思行

匡坐百日晏遨遊風物遷一朝丹疏入六載常在邊中
心不自分生世寧有偏患無經濟才食祿何足專養馬
念馳逐按劍思握權心若醉六籍目若營八埏射書聊
城將問策安期仙推食不充饑解衣難覆寒君子有所

思所思在仁賢

五蛇吟

五蛇從龍晉葉昌乘車跨馬遊四方知機決策心所藏
日引月長生明光念茲夙夜不可忘

傷歌行

淡淡浮雲生颯颯秋風來客子坐愁思抱劍久徘徊中
朝授官爵本以恤民災時俗競繁華棄置不復懷朝遊
過上苑夕宴登高臺絃歌滿堂下旨酒盈樽罍富貴豈

不樂貧賤多渴饑以言推所欲均半育羣黎

將苑謠

將苑琅琅編簡多自憂邊塞沒銅駝三關兩鎮思經過
匡時濟世義不頗金聲玉節流江河

升天行

劉郎本是神仙客鍊就金丹生羽翼雲水千重恣遠遊
洞文霞笈流篇籍洪崖拍肩赤松笑玄素二女呈窈窕
才輕九宇未足奇道洽三真始為妙不離平地已升天

日月星辰齊照耀

白馬篇

白馬青絲轡寶刀束馬頭朱衣錦繡裾意氣若雲浮經
過鬪難陌出入凌雲樓跨馬意何如男兒舊學書聞說
君臣義仗節欲征誅虎豹蹲九關豺狼叅兩隅生民何
擾擾諸將復遽遽東方水流血西土還報捷匡世缺雄
才欺君有心訣馬首奮如龍噴沫立奇功馬蹄輕似鳥
八面振威風人馬兩相宜何如八駿馳行空九萬里躍

馬定遠陸

寄懷

蛾眉將駿骨總是千金姿
難教雙麗絕并取一朝隨
躑躅心所重慷慨淚橫垂
歡愛倘再得功名去莫追

結客少年場

寄身燕趙間服食駐朱顏
琴書室中滿車馬門外還
送客復迎客投壺兼對奕
飲酒不論觥看山來着屐
葛巾文六角珠履雲五色
論道洽伊周談兵恥韓白
門下客

三千一朝去衝敵

自君之出矣

自君之出矣不復理容粧思君如寶鏡耿耿照空房
自君之出矣蟾光幾盈缺思君若連環綿綿不可絕
自君之出矣車馬無回聲思君若春草除去復還生

射虎行

問君何為好射虎虎能食人人受苦人家積粟養牛羊
牛羊食粟喂虎狼食羊猶尚可食人愁殺我牙爪夾妖

魔貪嗔急於火人失智虎有威說着射虎人驚疑有客
驅車過山麓力高卞孟心機足張弧挾矢設網羅虎亦
聞之生齟齬嗟哉嗟哉虎本愚天帝念之為愁吁虎若
不食人客亦無所嗔

古從軍行

從軍本為報國恩跨馬出遊古塞門召募三河忠義士
一日團結如雲屯男兒從來通六藝不分塵沙離邊騎
劍磨流出射斗光賦成常有凌雲氣軍中多少豪俠徒

相共飲酒歌且呼寶刀金甲披掛就萬里長驅西破胡
古塞上曲七首

其一

胡笳渺渺度關門旅鴈飄飄過古村獨有蘇卿愁至骨
一聲哭盡九邊魂

其二

土營沙寨半荒塘漠漠平川暗夕陽笑殺公孫為布被
有何繡幕障邊疆

其三

漢軍大半懶征行
零落軍書不記名
昨夜邊人傳鐵騎
依稀又到古龍城

其四

都護將軍性氣和
葡萄美酒奏弦歌
折衝樽俎非無謂
遮莫沙村走駱駝

其五

紫禁昭君生入胡
琵琶千歲唱靡蕪
向來北去紅顏婦

多少良工作畫圖

其六

摩笄山頭烽火紅須臾照見數營空賊來不解傳刁斗
何況雲臺論戰功

其七

古來大將運機謀指畫軍符夜未休可怪紅粧連甲隊
欲將歌舞覓封侯

長安道三首

其一

來往都城道探知朝士心若聞身世事定肯却黃金

其二

一日再三往奔馳十二時郊原芳草意惟有馬蹄知

其三

長安九門路車馬不曾閒借問驅馳者何人謁帝關

江南曲二首

其一

江南好風物猶似舊時不春雲回塞鴈不帶漢川流

其二

一去數千里詎知行遠近道上有征人怕問江南信

塞下曲五首

其一

沙色上侵天匈奴數犯邊將軍好歌舞不肯勒燕然

其二

居鄉愁敵騎入郭怕官軍商量何所定愁坐日斜曛

其三

無錢難倚市有酒且傾卮
邊塞窮通事惟憑天意為

其四

昨日聞弦管今朝是土堆
人生不如葉猶得趁風回

其五

野老談時歲何時見太平
生來知日月不肯暗中行

五雜俎

其一

五雜俎天上雲往復還紅日曛不得已諫周君

其二

五雜俎綺繡裳往復還明月光不得已誅王郎

其三

五雜俎秋漢星往復還春夜螢不得已脩六經

去邪蒿曲

博士邢恃名光北史六經淵源授太子廚人但知進甘
旨邪蒿滋味只如此名惡物必賤何用奉玉齒至哉邢

子心弼亮以終始珍饌不進不休邪蒿不去不止

楊柳枝詞四首

其一

楊柳嫋嫋任風吹心要欺風風不知引得塵沙滿堤岸
朝來壓折柳條枝

其二

生憎楊柳性柔邪纔見東風舞未涯土長根生何太易
豫章七歲始萌芽

其三

楊柳夾帶杏花開
婀娜鮮妍不自裁
絮落水中飛不起
烟迷岸上坐徘徊

其四

斬楊植柏是生涯
列映樓臺帝子家
萬歲千秋垂古色
春風曉日繡雲霞

古離別

江月湛清夜
皎日當及晨
陰暉復陽曜
照見離別人
借

問遠行客何為輕青春答云有所以邊塞多風塵男兒
急君父時世良苦辛心高悲俗緣義重辭所親佳人收
淚拜脫釵致慙勤功名千古義情昵一日新君行為邦國
何須戀妾身

出塞曲

邊塞苦殺傷將軍多怯懦天驕迅電馳宛馬流星過借
問食肉徒何人貽此禍翩翩遊俠子仗劍出閭里忠貞
白日懸機關當時起挽弓不在強騎馬不在良所貴寸

心白烈烈如秋霜我生知有死生死皆前定何用苦低徊從人學邪佞

古風

詠懷三十首

其一

麒麟不踐生鳳凰百鳥依乃知聖人出蒸庶同所歸濟世寰海服營已妻孥達明德麗日月燭照通萬微齋居含淳質九牧生光輝逢饑願推食遇寒思解衣禮周本

由智恩洽還重威有如龍變化一日乘雲飛

其二

天地疑彈丸日月烏兔飛一氣渾且噩運轉無停機大
聖觀元化端倪垂裳衣神融通萬方精理識九圍三才
一以貫六合同其歸名教本自然有無兩無依誰哉語
至道釋然分是非

其三

浙瀝西風生素秋團白露中天淡輕雲金波皎蟾兔客

予理裳衣循堦旋矩步秉燭開芝房展書闔朱戶緬想
百代雄矯首屬欣慕延思緝長懷達觀披廣度精微自
心得談辭非所屑

其四

其五

浩浩穹壤內一氣常感通山河獻靈秀生有百代雄龍
蟠抱三辰虎踞經八戎風雲隨指顧日月回掌中手提
屬鏤劍目送塞上鴻豈無聲色資慚愧海宇空男兒不
命世何用懸朱弓

其六

其七

大道運廢興機緘密於網
聰明憲天文妙用在指掌
正邪各相勝陰陽互來往
災劉本籍羽光武還資莽
陰曠不晦冥陽靈何由晃
升沉理固然鏡燭非外獎

其八

始吾七齡時宴息思天道
精慮入窈冥玄夜漫浩浩
因念死生情劃焉動中慄
人生既有終神仙詎私好
所期訪真訣煉藥駐玉貌
焉知五十秋未得展懷抱
彈劍將

遠遊沉憂徹蒼昊

其九

伏羲畫八卦軒帝調宮商聖心造人倫一日萬世長運
精超無始含思垂未央蕩蕩寰宇內寸衷俱蘊藏彼哉
夸毗子營已滑圓方雕琢混沌竅以為食肉腸家國既
坎壈爾身亦淪亾

其十

吾在大方內流觀玄化初天地本一竅日月雙流珠清

濁分山河五緯不並居大象極虛靈萬物燦焉殊中有
聖人立神明為其徒包絡無內外精明超有無元理所
不釋誓將規輿圖

其十一

形成別上下貴賤理自然所以成萬物惟在君臣權大
道既陵夷叔季彝倫愆毫髮一為差倒置躋天淵堯舜
不可作湯武亦已偏大哉管夷吾匡世日月懸仲尼春
秋書秉筆以精研

其十二

川流赴東海涓涓無止息君子秉明義夙夜常警惕道
在日用間變化非可測神龍乘雲翔精理亦綿歷顏回
雖生知學履復純密功業道所生聰明心自得

其十三

大舜居東夷耕稼承二親傲弟不為咈中心但安仁一
朝邁王厯得之河水濱天命既有赫覃思安萬民四岳
一以舉鳴珮為王臣敷言共光被純德無緇磷委順同

大化千古稱其真

其十四

昔余夢仲尼提耳命我言王道莫慕蕪行義貴達權河
海儼聖容千載誰可誼謗劣秉遺訓匡坐求其源中歲
遭嶮澼世道為籠樊淳風倘未凋心意哀元元

其十五

大海無擇流春林無委枝明德包宇宙逆順皆善辭君
子抱宏畧俯仰祈良規責已有餘暇與人無怨思歲銘

古人誼吾獨求輕肥

其十六

大言人所怖小言人所嗤所念唇齒劣不能為朱絲蘭
蕙雖馨香因風吹庭幃哲人秉明志啟口多微辭衷情
倘未和誰能沃心脾

其十七

玉沉當自見珠去有時還劉曜乃何人隱居管涔山童
子持寶劍再拜揚玉顏致辭且敬獻留珮聲潺潺一歲

換五色三尺當重關寄物不虛得亦復排羣蠻

其十八

越客遊燕趙歲久若故鄉被服多氊裘挾彈戎馬行
顰眉憂國難揮涕悲民殃有酒非不飲所適非豆觴展書
自低回撫劍多慨慷終焉奮羽翼六合為鷹揚

其十九

浩浩北風起邊聲颯已聞蕭條轉幽谷慘淡生黃雲敵
騎三五輩突至如驚膚豈無塞上卒什伍曾不分王猷

先訓練六籍皆兵文鄰鄰比閭士誰謂非三軍何不作
內政安居已策勲

其二十

天道生混沌一氣妙萬方廢興理所定誰能易其常造
化本無言賢聖持天綱孔明不忘漢仁傑還造唐日月
暫薄蝕倏忽回重光神靈護明哲小人物所戕彼哉莽
卓徒漸滅何由長

其二十一

藹藹珪璋士特達懷內方步趨出矩矱蘭蕙生馨香華
心仰芳躅一德超衆行如何松柏資委質桃李場陽春
不自保嚴霜折其光宛轉入邪徑黽勉遊曲梁哀哉繞
指柔無復百煉剛

其二十二

混沌薄元化大道生廢興五運相終始人倫有分并
氣迴日月山岳以峙凝大哉天地機乃在一念精伏羲
畫八卦妙契萬物靈聖哲神所啟時俗誰能撓

其二十三

人心包天地私意安所容區區營身術咫尺生劍鋒方
其拘攣時一介不可通忤心當路排合意千里逢一人
未成仇萬千憎其風譬如蒸沙粒何由覩成功

其二十四

門牆啟尤覺人心生寇仇上下本同根身世非兩謀如
何全軀士肉食忘所憂黃金充私橐白役破公州徒營
一家計橫使萬姓愁羌戎覘人國狐兔經荒丘誰哉召

其侮晨夕空誅求及至謀身日終亦非嘉謀

其二十五

時俗藉津梁英雄自依據倘執禮義權縱橫有何懼白日
泛陽波六龍誰能御流沙逝西沉扶桑莫東駐天命無
短長人心有來去

其二十六

姑射有神人冰骨為其姿被服天機錦玉屑充渴饑窈
窕處金閨蘭蕙方歲蕤孤操凜霜雪抱瑟含微辭獨立

萬物表恥與姬姜隨視世若塵土擇對安足為

其二十七

仙子悟長生鍊元積真道一氣含太虛寶鼎手能造衣
裳翳白雲雞犬鳴丹竈玉帝校尺籍紫書方命召韓衆
攜竹冠盧敖奉金誥濟世有丹砂冲舉何足好

其二十八

玄女蓬其首感悟軒轅辭降世示兵訣精微誰能知糟
粕遺六韜孫子何足離天地有妙畧黃石非吾師冲虛

契真際車馬八極馳大道自底定嘈嘈徒爾為

其二十九

伊尹昔幽沉遺世在莘野負犁帶雨耕懸釣垂雲把
詠書味三謨展詩研大雅詠歌合匏弦達觀何瀟灑
終焉膺三聘為世驅六馬左相位不卑先覺道應寡
一朝居阿衡四海憂患寫因知畎畝中詎是忘情者

其三十

孟軻本吾師輔世遊齊梁談辭霏玉屑曠蕩仁義場一

言已有餘千言猶未央借問此何為楊墨充四方邪說
塞皇猷誠行成梯航禽獸食人肉世道兩以喪君子心
不忍齒舌流否臧為道立赤幟照灼日月光是非以析
然邪偽安所藏多言鬼所嫉無言安能詳

任節婦吟

白楊多悲風蕭瑟生曲房二十解簪珥白首謝容妝兩
鬢若日月矢死抱輝光嗟彼陌上燕歲歲棲我梁君子
奉高蓋駕言逝何方哀怨比琴箏絃促柱以傷君命一

何短妾命一何長願以妾贖君君在不可望祇因斑采
衣緝君珠珮裳

孫同府以不得迎養母夫人為繪像事之因賦白
雲篇贈之

白雲何靡靡瞻望在故鄉迢遞越萬里云何別高堂婉
戀慈母歡伊鬱不可忘歌彼陟岵詩旨酒盈我觴達道
莫能致沉思迫衷腸托之丹彩箋寫茲明月光日夕承
高隅髣髴流珮裳庶言結遐思耿耿明德旁

寄岑匡阜山人

蘭舟日行邁河關多苦辛遠與親交別曠望立風塵是
時春向暮冉冉柔條新余行獨逶迤留滯京洛濱千里
困長道十載為羈臣駕馬厭驅策委蓋愁逡巡惟是心
慮煩未能釋朱輪鉛刀雖黽勉豈無一割勤綺琴中自
理詎念知音人寄言同心客屈曲聊以陳

送海濱公八十詩

佳日湛清俎北堂弦管多侍子奉鳩杖國老意皤皤冠

益溢街衢尊俎四座羅列帛等丘山傾酒若江河齊童
三五行挾瑟振安歌流雲轉長袂陳舞屢婆娑俯仰凌
七盤飄搖切陽阿歌舞詎云畢高宴方嵯峨涼秋白露
垂芳飈動池荷矚北帝城隅甲第馳鳴珂皇路穆清塵
庶僚願如何玉樹齊萬年千秋沐恩波

奉和春園翁怡椿軒韻

朱軒赫弘敞珍木鬱歲蕤芳條歷年紀手澤猶未衰緬
想趨庭日冠珮肅容儀文侍陽景邁朝植玉露滋楨榦

方石起柔葉漸雲披端知歲華改飄搖芝蓋移奕世登
榮峻章服正差池清階既克類嘉樹仍在斯徘徊感疇
昔睇盼適今茲物色固常競奇名亦永垂

臧烈婦詩

白楊當隴間落葉萎以黃君子弭高蓋中道多徬徨自
悲妾命薄不如鳳與凰雙棲不及年飄搖獨先翔君命
若秋露不能晞初陽妾命非春華安得隨風揚睖懷連
理木並蒂在高岡但願同心死不願異域芳縱妾愛賤

軀為誰飾容妝及時整衣帶臨逝結鳴璫慷慨就泉路
從容辭曲房身將蔓草萎名與蘭蕙香光明燭八埏日
月為披攘

五言排律

四戒示諸生

戒博奕

余作四箴言偏攻博奕門人財那可得已祿已先奔一
擲能傾產千呼會爽魂嗔痴尋苦業貪欲是迷根外負

鄉閭誚中傷父母恩黃金孤注盡白晝五時昏禮樂妨
綜理詩書廢討論何如謝徒輩吾道凜然尊

戒鬪狠

軻書規不孝鬪狠有明條克讓惟堯頌溫恭是舜謠負
荆登第宅納履在圯橋遜弟從來有乖離竟所招禮儀
恒不密血氣更難調暴橫聞千里危亡起一朝災殃遺
父母喪亂及朋僚自反修仁術爭心早已銷

戒逸遊

獨有衣冠士偏宜戒逸遊一朝輕失足終歲起包羞敗
德疇人賤傾貲智者憂狎山多餌虎玩水必翻舟姐已
興危亂妹姬結釁讐瓊臺今作市金谷已成丘色相為
空戒歡娛是水漚勸君升孔室無復向秦樓

戒飲酒

衛公陳抑戒小子作箴文飲酒無明德修身有令聞酣
宮猶反道醉市更非羣麴孽偏傷性壺觴不立勲千鍾
王業喪一旦霸圖分阮籍何須羨劉伶不足云清風行

處散白日坐來曛請謝杯中物還圖閣上雲

送田叅將

中原持節士誰不識田郎啓口填權貴捫心議廟堂復
官新破例出塞舊開疆志吞三峽水氣逼九秋霜五星
占驗熟六甲陣圖詳我亦留濡客聞君意慨慷

步虛詞二十三章

其一

青簡烏傳來金書花共開悟真融碧落探妙上瑤臺浮

名念裏盡樂意靜中回玄漢明如電沉深響若雷春風
行折柳太極坐觀梅遊戲三千界懸知上聖才

其二

曾上青天極能驅白日輪目中輕世界足下躋星辰元
氣回千古真風亘八垠青牛披綠甲白馬滾紅塵待掃
攬搶去方知億萬春

其三

瑤天迴不極杲日麗常懸道器知宗本心機會轉旋吸

精蟬飲露換骨鶴凌烟空法聲聞悟金心色相宣五神
融五嶽三脉配三川一入長生路慈航理白筌

其四

五福宗洪範三靈會洛書璿璣迴氣馬華蓋轉雲車法
象臻玄理神光合太虛陽春生蟠煉陰魄長蟾蜍精衛
知填海奸雄會剝盧星官垂劍術按法早行誅

其五

大言驚宇宙小隱適山林觀世壺中靜知機象外深洞

丈開萬卷絳嶺歷千尋雄心沉白水銳氣煉黃金謁聖
玄宮裏尋仙蒼木陰未能揮寶劍聊用撫瑤琴

其六

浩浩虛無裏魏魏象帝先玉臺凌萬丈琪樹歷千年已
識龍車邁還逢鶴駕翩凌神遊桂嶺當夕下芝田嘯月
開書坐乘雲抱笛眠歡情饒物外本為世中憐

其七

曾跨青霄鶴來聽碧樹難蓮花從火發桂葉與雲齊目

曠乾坤小身高日月低壺中雙鳳隱劍外六龍迷藥性
因明啓丹功自敬躋崆峒何用訪於此識端倪

其八

懺悔從心起修持自道生七籤書日展六甲義時明伏
虎風常寂降龍雷自橫金箱圖北嶽玉局運南征造化
壺中轉星辰掌上行神仙無所語一曲頌升平

其九

道士鍊真文天機隱白雲神兵朱火出聖化玉泉分鑄

鍊昆吾劍驅馳太乙軍
四蹄齊馬隊兩翼奮鵝羣
靈氣千秋震威名萬里聞
旄頭星氣薄雉尾日華曛
祕法叅玄妙誰能獻聖君

其十

一法齊王化千靈肅聖筵
莊嚴安宇宙變化轉山川
玄圃人間闢神洲陸地旋
玉麟心出世丹鳳氣冲天
藥自玄中得兵從象外傳
足摩三島窟手拂五雲鞭
八極遊無碍縱橫狎水仙

其十一

道自心靈悟機因物象生玄風流日用妙理在常行神
氣超無極精微合有情玉藏山自潤珠在水還明松子
非難學王喬本易成何人寄丹訣白日試飛昇

其十二

非無金鼎訣自少碧山遊韓生騎白鹿老子跨青牛余
亦邀玄鶴相將訪十洲遐哉尋玉洞邈矣度丹丘因笑
陶貞白何須不下樓

其十三

大聖摘言密神仙立意高明心神不變知命意先豪要
領叅麟角精微入兔毛三才披道奧六籍悟真韜世泰
登金馬時危命寶刀文章藏石室不必著離騷

其十四

軒黃方好道我本列仙才每過蓬萊島曾上凌雲臺非
無遠遊意自多塵世哀春風迴玉管夜月隱金罍將軍
營細柳宰相調鹽梅丹砂即經濟寶鼎誰能開

其十五

將門應學道仙法自通兵寶劍神靈授真符虎豹行仁
風隨後殿浩氣是先聲義動三光合機深五嶽傾本心
期濟世誰羨列侯名

其十六

神仙應治世輔弼自須才玉殿重門啟丹宮複道開三
花明戶席八桂隱樽壘堯讓夔龍入軒聰后牧來知人
千載備得一萬方回南極星光見遙知接上台

其十七

九州通水府八寶麗金華洞門飛紫氣此是上仙家濟
世皆真訣安民即道葩琴書消日月衣帶結烟霞蕭史
堪乘鳳張騫久泛槎年年食玉粒幾日發三花

其十八

龍馭皆英傑麟驂即大賢訪丹先得道問藥可成仙敬
士開雲館迎賓敞日筵二桃非祕術五鼎是長年元聖
寧無德垂情渭水邊

其十九

神藻生常識玄機即通言聰聰通四耳懸解徹三門畫
壁圖仙史彤簫折道論真風平地起妙理匹夫存野鵠
猶傳法遊魚亦訊誼音從萬象起觀世得心源

其二十

上界非無事中天亦有人一元通大象萬品不離塵馭世
多龍女璇璣並斗身法華開玉樹心鏡轉金輪何用求
方外惟須念玉真

其二十一

誰誦洞靈文
朱篇綠字芬
龍蛇象外隱
科斗畫中分
蒼頡精研得
軒轅睿思聞
殺機天地發
祇用建人羣

其二十二

玄化垂真訣
仙機在席端
至人心洞達
妙道日盤桓
應世神無碍
調身理自安
冲虚神氣守
澹蕩百靈歡
變處風雲起
開來宇宙寬
凌霄持一劍
誰為辟邪難

其二十三

真人怡寢息
灝氣日流行
萬方心不挂
一貫理真明
宇宙機偏合
烟霞夢不驚
道摩疴自去
服食骨先輕
寶鼎風烟正
金壺滴漏清
華山曾羽化
留得五龍名

青霞集卷五

欽定四庫全書

青霞集卷六

明 沈鍊 撰

七言排律

寄奉陸宮保

將相兼權屬上公，華夷交臂憶英雄。
金吾邸第開新府，虎衛韜鈴邁古風。
手握綱常為大孝，心存社稷是元功。
指揮士馬收河北，悵望烟塵到海東。
不分曹瞞為逆賊，

耻從魏絳學和戎知時詎怕薰天勢仗義偏懷貫日忠
恩洽彤庭忻附鳳慶過清渭兆非熊淹該誼與探囊並
敏捷機將破竹同氣作星辰長拱極思如流水必朝宗
不辭玄葉千莖素祇抱葵花一點紅宣父尊周文未喪
孔明輔漢意無窮道高日月三靈上名在乾坤萬古中
一劍上方曾借得擎天八柱倚崆峒

五言律

同馮比部集賢膳部草堂得心字

蘭館樽初集金門漏欲沉清風七子賦明月二難心契
好過逢數歡娛燕笑深馬嘶芳草地人醉落花陰

關山月

明月東方出關山正在西愁聞蟾兔滿偏是照迴溪玉
露含光重金風帶影低詎令秋氣爽翻使戍心迷

俠客行

從來好遊俠寶劍不曾離白馬馳長道黃金報所知風
流傾斗酒調笑折花枝唯有燕雲念平生未肯移

集賢膳部草堂得荷字

秉燭過逢偶乘閒引興多
笛中傳岸柳香外泛池荷
道合簪偏聚時清酒易酡
明朝問花事風雨夜如何

過謝四溟山房得香字

佳處景難忘相逢再舉觴
鳥疑曾識面花已慣聞香
送目烟霞外論心翰墨場
但教歡賞洽隨地有滄浪

集孫子長草堂得園字

易遇雙文玉難逢一笑言
所嗟人似月千里共黃昏
酌

酒依金谷題詩擬兔園深歡不能別翻覺重銷魂

飲張水部園中得琴字

靄靄辟疆心言棲五畝陰秋風行倚劍曉月坐調琴啼
鳥歌偏劇飛花舞不禁從來臺館樂未必勝園林

同吳膳部諸公會集草堂得周字

清人居水曲明德象分流世事多歧路人心有道周飲
瓢懷耿潔擊楫抱殷憂直恐風波滿誰能傷凜秋

又得歌字

春色移庭樹知余繫馬多相逢復不飲其奈落花何曠
達輕歡燕流連發浩歌况同知已在杯到詎蹉跎

詠園碁

自將碁作世誰為世如碁日月枰中轉山河掌上移雁
飛教作陣龍躍引成麾滿席天花墜知余得意時

六橋堤上看美人走馬

妖姬馳駿馬佳麗本相同玉腕光搖轡羅衣色映驄汗
流成膩露塵起是香風為借春光去將心送落紅

贈鄭一陽太醫

鄭公居谷口煉藥一陽成
劍外星辰迴琴中山水生門
多三楚客身在五湖行為解
探囊術難逃世上名

送陳子先補增

陳琳試高等章甫共興歌
入夜猶吟誦升堂事講磨析
疑觀日月間善決江河嗟余迷學願因子悟盈科

輓劉孺人

孺人懷令德內助有輝光
奕葉青袍貴階庭玉樹芳百

年歸夜室五屬奠春漿積善流餘慶諸孫不可忘

寄樂昌王殿下

遷客滯遼州回經萬里秋感時頻仗劍望遠欲登樓露
下芙蓉濕風生桂子浮淮王池館近何日幸同遊

從軍行

從軍非必苦遊俠更為雄七寶成雙劍三年造一弓殺
人沉海日走馬逐遼風意氣懷明主誰論萬里功

寄萬鹿園總戎二首

玉帳東風入春歸細柳營將軍披羽服揮麈坐談兵旗
定轅門肅香銷燕室清封侯非所願但遣四方平

其二

樓船橫漢水五月渡天津絕域回龍騎清朝識虎臣營
中時校射帳裏夜邀賓吹出梁州曲還悲塞上人

送施武陵之鹽官丞

世皆卑道拙余獨嘆才難珥筆開千卷摳衣博一官戒
行車騎急餞別酒盃寬吳會多山水題詩好寄看

送朱縣博赴武寧

余嘗讀功令知重校官才升堂鳴鶯鼓釋奠洗雲壘獻
賦嗟雄等明經是鼎來諸生方引領驅馬莫徘徊

送馬節推之慶遠

莫以炎荒郡非承明主恩節旄千里重軒蓋百城尊飲
冰懷古道仗劍出都門白首心逾壯知君是馬援

題楊進士小像

識面尚云易知心良獨難誰能負奇氣長自被儒冠麗

藻凌雲出清光逼斗看虎頭應不偶辛苦且加餐

送丘少府之濬縣

綰綬佐專城為郎已不輕但能持節操何懼少聲名折
柳詎勝贈看花在此行憐君是知己相許慰平生

息馬論道

誰道驅馳地翻為講授筵解鞍還作席投轡別為弦遠
馭輕千里空行歷九天始知祠闕裏總勝勒燕然

賦得澹泉篇贈顧院使

本為金馬客却賞竹林泉共說甘如醴誰知淡是玄洗
心懸浩蕩漱齒嚙雲烟世味余方苦逢君意洒然

送朱提學赴閩中

選署掄才重維藩典學尊皇文今日麗師道幾人存正
色登三事高名著五言知君行萬里不負大夫軒

送李直夫還越

知子樂絃誦從余陳蔡間自因萱北發將及雁南還昔
詠杯中月今題馬上山知音已輕別抱曲不須彈

昭君怨

賤妾羅衣薄君王寢殿深何須矜艷色不自用黃金馬
上千行淚宮中一片心琵琶彈不盡總向玉關尋

俠客行

北里新名俠門多隱者車問人尋寶劍留客註丹書七
貴空聞姓三公欲造廬寧甘布衣老不肯曳長裾

賦得林中啼鳥

幽鳥園林迴飛鳴本自珍天機枝上曉風韻葉邊春日

暖和千弄霜淒切一嘖感時啼不歇應有解言人

初夏同莫膳部過吳比部草堂論詩得中字

二仲既相逢知余馬首東誰望千里外還聚一堂中對
酒邀山月論詩入國風同聲自相和寧復嘆飛蓬

五日遊將軍射林莫子良後至以詩嘲之

相約出郊坻兼逢重五時世人皆賞節吾黨屬題詩射
柳逢場暇看花恨日遲如何張孺子偏後老人期

槐陰堂為沈開府賦

幕府近西墉雙槐夾院叢檻垂浮葉外簾捲落花中舞
處猶籠月歌邊不礙風一樽從共飲能折九邊衝

送毛比部出守端州

毛公忻奉檄詎是為專城典郡懷明牧分曹本碩卿水
壺預為政風月餞將行千里蒙恩澤一樽何厭傾

送周武選外補廣東大叅

珥筆中郎署知君意氣雄坐移芳桂月叅馭紫薇風鼓
枻三江外看花百粵中太平官事簡慎勿立奇功

送袁客曹定山犒師

鬱鬱三吳彥名高屬省臣一為持節使多少折梅人行
李圖書出鳴騶譯象陳還將懷遠誼薦作八方珍

送張提學赴廣東

虎觀崇文日鴻儒校士年應知百粵地不異五雲天柳
借春風折杯將北斗懸送君臨絳帳吾道已恢然

送荏平縣徐幕

我昔為茲縣君今是幕曹相過新劍服猶憶舊旌旄要

路迎逢劇疲民撫字勞但教持節苦不用羨官高

送張少府俵馬還縣

秋風起京國何以送離人最苦衣冠客長驅道路塵出

門車馬敝還縣簿書新莫厭樽中酒明朝潞水濱

謝山人吳比部重集草堂得青字

節序驚余老壺樽對客醒鬢看今歲白眼向幾人青樂

飲非河朔悲歌是小星揚雄草玄處何日燕然銘

送王明府赴靈壁

王子雙鳬鳥新辭五鳳城暫迴抽筆興去作綰符行客
路依星署官居學水清泗濱多磬石應和綺琴鳴

送鄭郡幕赴興化

山水推名郡清才副幕寮梅花知幾樹應待朔風飄行
李懸雙劍壺飡奉一瓢為官不厭苦所至有風標

送黃博士赴曲江

聞君嶺表去八桂動征鞍迢遞行千里辛勤為一官青
雲流綺席杲日上朱紃奉檄非無喜功名在杏壇

送徐縣博赴繁昌

奉檄出河濱行看柳色新一官寧不貴五斗祇因貧絳
帳樽中色青羶馬上塵故鄉雲樹近早晚望慈親

端午諸同志集草堂得絲字

帝里風光麗相逢屬令時地除三徑僻人比八龍奇蒲
葉分傾酒榴花對賦詩祇應刻華燭何用續朱絲

送陳戶曹赴南部

年少異馮唐風流漢省郎金陵千里道粉署幾枝香意

氣壺漿集聲名歌吹長黃金知不顧贈予以干將

送岑山人出塞

黃雲馬首橫仗劍赴邊城雖歌出塞曲詎謂從軍行炎
夏征途壯河山旅望驚從來班定遠曾是一書生

宴集南鎮山池

桂席俯雲端山禽舞合歡羽觴流滿月仙館發幽蘭香
醕花能釀清絲水共彈不知歌詠地猶作晉衣冠

送張子良歸省

才子趨朝日寧親亦暫還應將宮錦色去作舞衣斑馬
上生歸夢樽中展別顏平生懷獻納未可滯鄉關

遊仙詩三首

乾坤真鼎氣日月自爐錘一得調元手千秋正氣綏
心虧曠達小智騁雕追誰識真仙道天然理自隨

其二

剛風千劫際妙法九華筵道外應無地心中自有天玉
笙吹引鶴朱果弄調猿駕馭英雄畢驂鸞禮上玄

其三

上仙傳寶訣經世即長生壽域開黃道慈雲麗赤城琴
中調造化奕裏運神兵功行三千滿應知頌太平

夜坐觀張博士平邊疏章賦此寄之

遷客不能寐吹簫度夜分因思前席事一讀賈生文豪
士家臨水雄關陣入雲高歌還達曙何日共垂勲

寄劉副將

邊塞一相逢憐君舊總戎名成五軍佐心是萬夫雄虎

節悲歌裏龍韜歡笑中別來猶感慨耿耿望長虹
得應職方書以詩答之

郎署飛符日題書問謫居自因鄉思到翻覺舊交疎塞
月塵沙裏邊風鼓角餘誰知遷客夢夜夜繞鸞輿

寄馮敬叔

同作他鄉客嗟余更滯留關山明月夜邊塞白雲秋漢
闕孤臣夢霜笳萬里愁桑乾河水近知是憶并州

賦得夢中携寶劍

烈士壯心驚將過鐵勒城恩從愁裏結勇向夢中生神
物千年隱奇文七字成匈奴猶未滅持此欲橫行

示襄袞二兒

吾生當國難兩疏謫邊關思親太行道憶主敬亭山風
急吹玄鬢時危損玉顏爾曹俱努力戈戟正珊珊

贈吳仕賢

本為珠履客聊寄玉壺仙經濟懸龍劍雄豪躍馬鞭題
詩五綵筆寫恨七條絃邊塞多風誼因逢吳仕賢

仲春會諸生賦

羽檄邊聲急將軍出塞遲時危思講武日永笑彈碁白
髮龍堆夢丹心韜畧知諸生各努力仗劍解重圍

前山曲為李直夫賦

本懷金馬調言對翠微居水竹流詞翰雲霞雜草書幽
探踪跡秘高卧姓名疎得意在丘壑他年升九衢

古別離

非關歧路多君意自蹉跎拭淚攀楊柳將心托綺羅北

風吹祖帳秋月照離歌斗酒今宵盡明朝奈爾何

銅雀臺

西陵鬱何近臺畔綺羅施蕙帳流明月光輝異昔時舞
衣還拭淚歌曲總成悲妾願從君化長為陵樹枝

劉生

劉生懷寶劍結束願從戎指顧邊塵上遨遊燕市中淹
留心似石談笑氣成虹斗酒悲知己誰令歡讌同

夏日率諸生同遊紫陽洞

朱夏洞天明仙宮敞玉京烟霞通一道歌管並諸生香
氣因風度瑤華是石成從來耽羽化今日共霞征

古意一首和童侍御

西閣開羅薦東鄰出艷妝聽歌嬌欲轉看舞意先翔映
日流珠鈿因風落珮香不知臺畔客俱是冶遊郎

春晴

白日雲相薄青樓樹作屏石枝零夜雨鶯語恰春晴湖
水明新練山花散錦城可能開杖屨孤眺坐輕盈

送袁節推考績

平生識明府為吏卻黃金羅袖迴滄渚香颺出蕙林贈
行嗟寶劍念別悵瑤琴難以一杯酒酌君千載心

送周大尹入覲

卻金為漢吏馬首氣何雄將上河陽計先乘御史驄旌
旗颺古節鼓吹奏民風今日山陰道方知在鏡中

送山陰蘭博邑教授湖州

奉檄是儒官驅車出上蘭壺觴追餞處桃李滿城看念

別嗟雙劍隨身只一冠
蘇湖得君往古道重波瀾

送馮達甫北上

江樹正含情維舟送遠征
河梁南鴈起岐路北雲生
劍氣冲牛斗簫聲達鳳城
不知離別處斗酒為誰傾

贈李寶山將軍

將軍休劍甲日燕寶山居
月散千林綺泉流萬壑珠
香雲迷武騎花露滴軍書
乘秋還校獵非是樂樵漁

為童昌原母壽賦

白髮垂堂日朱筵獻壽時能招萬里客來上百年卮黃
竹歌偏遠斑斕舞未遲余為彤管賦千載列風詩

送別南衡童侍御二首

遷客懷文藻應知是謫仙徒云離殿闕猶得覽山川白
簡經霜折丹心共日懸若過楚水上莫賦弔湘篇

其二

送別隨征蓋那能向水濱共知今日酒不是故園春河
柳驕行色巖花笑謫臣千金裝寶劍可以贈斯人

贈望洋劉子

日下劉公幹文成五色霞縱遊春苑馬沉醉夜闌花寶
劍光頻發瑤琴意獨賒時聞邊騎動往往泣悲笳

三江

飛梁跨浦口遙睇海山沉潮落空城暮雲低斷壑陰三
山區外想億劫幻中心試問蓬萊水于今復幾深

寄張司丞

十載為郎吏三時候選曹數奇才愈拙官冷氣偏豪嘆

老持明鏡憂邊看寶刀若逢知己譽置我在臨洮

贈張玉亭刑曹

聞道張平子閒居賦四愁行吟過郎署坐嘯在皇州水
石分亭榭烟霞入佩鉤還尋高詠士騎馬共行遊

得茅鹿門別駕廣平消息

故人嗟遠道書是雁傳來不因遷客苦誰為寄江梅驛
路長驅馬官亭獨舉杯懸知漢廷吏當識賈生才

送胡二川為長山令

莫厭郎官薄專城氣本奢符分玄圃竹綬結上林花
水行時政鳴琴坐曉衙他年循吏傳誰數五侯家

送宋承山作祁門令

知君五鳳客亦復跨雙鳬宋玉名高楚郎官宿應吳仁
心琴裏發民事鏡中蘇送別無須酒陽春在路衢

潞河作和張司丞二首

近關山河麗乘春景物明中流波作錦夾岸柳如城雲
動飛帆影風迴雜鼓聲况逢張博望何異泛槎行

其二

玉珂知不並蘭棹幸同遊
聽鶯堤畔樹送雁驛邊樓
歌外風輕度杯中月暗浮
徒知行役久無復越鄉憂

莫中江儀曹見過

懶性妨冠蓋君來更作歡
聲名堪比鳳意氣重過蘭
山水朱絃裏風雲綠筆端
還因竹林賞一遣酒杯寬

送朱梅泉赴東鄉博

文學重朱雲傳經楚國間
仕官為博士垂老戀明君
禮

樂乘時曙齋宮達夜分丈夫懷氣節隨地策功勳

擣衣

堦庭木葉下是妾擣衣時秋風度紈素蕭瑟不勝悲淚
垂雙杵落魂向百城馳妾意千重轉君心恐未知

悼友父

白首朱門客言從地下遊平生醉羅綺今夕卧松楸月
照泉臺夜風生隴岸秋一嗟流水恨千載共悠悠

送陳藍田

藍蔭詎為芬言棲隴畝雲色凌秋塢竹香帶曉堂芸霧
捲千山出川迴匹練分琴書足投賞誰羨赤城文

送丁君赴宜陽縣令

名士宰方城驅車出漢京贈言多麗藻餞別有諸卿行
李先隨鶴前驅早抗旌看君作循吏不負寶刀橫

送王龍阜給使廣西宗藩二首

離別自多感况逢知己行黃金耻為贈白羽去何輕惜
別芳樽滿臨歧寶劍橫為君彈出塞慷慨獻平生

其二

侍臣將使節王命一何尊
萬里踰荒徼渾如在掖垣
藩臺應並服漁牧總攀軒
珥筆驅皇路歸來獻納繁

風雨往三江送鄭梧野還歙

高士懷名賞偏乘風雨來
秋聲清鼓吹霽色映樓臺
楊柳吹將折芙蓉潤欲開
送君如浦水臨發更徘徊

送章東僊江右憲伯

憲卿持節鉞千里障元元
不因飛白簡何以駕朱軒
夜

月清征旆秋風壯別樽知君歷荆楚所至有平反

東溪曲贈趙大將軍

仗劍事邊塞那言山水間自因心洞達所以樂潺湲日出蕩舟遠風輕垂釣閒誰知烟霧裏能距玉門關

送葛春谷

我已苦為縣不堪行送君誰令一片月散作兩行雲楊柳堤邊折葡萄馬上分相思莫相問但遣令名聞

蒲屋篇贈葉上舍

本是青雲客言依綠水邊玉堂何用早蒲渚且悠然雨
葉流書草烟花泊釣船棲遲意不淺勲業待施鞭

暮夜懷袁定山儀曹

不覺落花盡長懷飲餞時流光徒屈指辛苦有誰知夜
月淒琴曲春風隔酒卮聞君消息到翻重別離悲

奉酬王東華使君

春夜抱琴弄知君調獨高但從心曲轉不厭指中勞慷
慨揚朱旆低回看寶刀若非馳道路何以念同袍

送王東華明府考績五首

持節過魏郡三年氣色多清光如滿月耿耿照漳河馬
瘦征人劇門閒隱者過將歸報明主行矣莫蹉跎

其二

行李河橋發清宵一劍懸鈴聲傳大道葢影入長川名
重曾誇鳳官清不異仙誰能持節鉞匹馬去朝天

其三

符篆青春發公庭白日開自能輕巧宦何恨乏良媒行

李書三篋壺食水一杯徒聞薄楊震無復夜金來

其四

千里流恩澤應同漳水迴那逢持鉞使偏是牧人才令
發陽春布冤清澍雨來懸知捧明月從此照燕臺

其五

揚旆邯鄲道踟躕多柳條何因不攀折欲贈意先搖義
勝鑾聲遠神清馬鬣驕空情托流水相送出河橋

送皇甫水部赴荊州權竹木

使節遙臨楚湘雲上馬鞍客行千里路民愛一分寬
權處平看水閒時靜詠蘭惟應冰雪調持此稱冬官

王先生抱道林壑別號養浩一日出卷命余賦之
白首林中客青山物外居無憂仍進酒多靜只觀書
枕石眠山氣飡霞飽太虛浩然忘老去宇宙復焉如

偶成

矯矯封侯客能為筆硯羈清狂非幼志浩嘯激幽思
下里聽羣和高山嘆獨知久慚韓鄧笑咄咄自驚疑

輓葛巵山大叅

家世綰銀黃鳴鑣出建章
官隨勲並轉名以節先揚寶
劍人爭識遺弓子獨藏
誰能書太史彤管有輝光

七言律

山中寄鄒重文

尋真訪道數經秋今日方成萬里遊
玉洞祇疑天上坐金河不是世中流
淵明嗜酒猶逢社徵伯耽書懶下樓
賸欲過溪同一笑移文恐作北山羞

送朱進士北上應試

獵獵風吹吳市塵行人更復送行人
洛陽三月君先到正值桃花上苑春
酌酒勸歌多慷慨登途跨馬莫逡巡
今宵仗劍遨遊客已是當庭獻納臣

送張司丞有功北上

北風吹動寶刀初短別江城念有餘
知己不因長會面論心只欲屢題書
征帆未及春先到鄉夢須教歲併除
君若逢人談姓字知余京國舊交疎

感懷

沙塞黃花帶雪開
謫臣中酒坐徘徊
睢陽罵賊心偏壯
上國思君意未灰
南北風塵常按劍
乾坤氣序笑含杯
醉醒數把春秋看
還有程嬰救趙來

春日泛湖

春日湖容麗藻揚
樓船臨泛在中央
泉憐詞客留清響
山對佳人學靚妝
柳葉褰衣同作帳
桃花過酒併生香
共嗟此地無雙景
莫厭堤邊遊冶郎

贈李將軍

當年海上揚塵日，獨有將軍劍戟馳。
刁斗只令諸校集，羽書不使侍臣知。
時將落葉供書草，自遣飛花入酒卮。
勲業定知長劍在，徒嗟李廣未逢時。

寄諸生楊子中

碧柳清霄怨暮春，沙明水白更傷神。
娟娟野月當樓靜，冉冉飛花入座頻。
海畔音書常阻絕，山城瘦馬苦逡巡。
坐憐物色多惆悵，欲覓芳洲綵句新。

秋懷

風雨搖秋溼不開
紛林殘葉逐人來
寒雲作陣江關暝
粉蝶遙傳鼓角哀
直北朱旗真下淚
淮陰水色未登臺
玉堂金閣雙龍管
亂落梅花正舉杯

夜月

月華宵霽彩雲端
天上遙傳白玉盤
解道清光千里在
不知今昔幾人看
高樓自恨關山遠
短笛仍悲道路難
碧水春風俱涕淚
舉頭何日見長安

春日試諸友偶成

精舍會臨蘭若地春城初試管絃時日移雲影過書幌
風送花香入硯池淑氣韶光皆中節幽花奇鳥總成詞
承明正憶長楊賦莫遣揮毫待日遲

送鄭明府之維揚

東風初泛木蘭舟南去維揚復勝遊弱柳千條垂岸出
飛泉百道傍河流開樽幸接黃金客鼓棹還經白鷺州
斗酒相逢成一醉烟波莫遣使君愁

秋夜感懷

颯颯西風日夜吹將軍出塞又空回不知白骨堆沙岸
猶自紅粧送酒杯諸葛已無籌筆驛李陵偏築望鄉臺
悲歌莫厭傷心曲不是忠臣定不哀

送蕭汝行下第南還

遊子驅車出洛城臨歧執手涕俱橫如何萬里青雲客
獨把千金寶劍行歌調不能隨水逝酒卮直願與河傾
君看一路垂楊色都是陽關送別情

哭楊椒山

郎官抗疏最知名玉簡霜毫海內驚
氣作山河今即古光齊日月死猶生
忠臣白骨千秋勁烈婦紅顏一旦傾
萬里祇看遷客淚朔風寒雪共吞聲

賦得周公握髮圖寄張明府

辛苦中丞鎮五戎建旄傳節日倥偬身騎白馬先諸將
手疏丹書達聖聰坐對桑乾惟飲水行吟紫塞自調弓
清宵耿耿周公夢勲業知存握髮中

詠懷二首寄徐太保

中原消息近何如故舊無人問謫居報國惟懷三尺劍
籌邊空作萬言書春秋首止曾題筆南北音塵已食魚
一片苦心懸碧落風烟浩浩獨憐予

其二

七年為客在三邊壯志飄飄一劍懸
取日虞淵光景切
載書牛斗語言偏
丹心種種齊春草
白髮絲絲映野烟
侵曉炷香還肅拜
誓清寰海答皇天

簡莫儀曹中江

雲間才子似君稀
文賦題成勝陸機
海內著書傳姓字
朝端珥筆讓光輝
苦吟坐榻頻辭客
多病趨朝只念歸
還過敝廬成一醉
不隨流騎繞朱扉

送劉明府應詔之京

承詔重欽明
盛日出郊初
值正陽時
風和百曲
彤簫發
日從千花
翠蓋移
雲物分明
懸祖帳
山河窈窕
送征旗
今看劍佩
趨宮闕
實有長楊
侍鳳池

秋懷

八寶山前精舍開
石床泉磴翠微隈
煉丹自穴烟霞洞
把卷常登草樹臺
數夢攀天珠闕近
暫歌出塞紫雲迴
承明三疏心偏憶
空有皇都白鴈來

賦邊詩

九邊烽火四方聞
臣子憂勞為國分
民部歲賁供戰士
勅書時下勵將軍
莫將和議為籌策
但以忠誠諭檄文
廊廟訏謨心一定
折鞭堪逐虎狼羣

題問津圖送趙憲副

憲府清華即近臣
况逢邊塞羽旄頻
題詩格調多追古
為政風流欲愛人
書絕中朝權貴客
劍隨四海不羈身
王程正是關心切
好學宣尼早問津

送沈憲府赴湖湘

十載專城筋骨疲
白頭今得外臺推
人生最苦投珠暗
仕宦何妨執戟遲
客路同袍應勸酒
江城匹馬好題詩
知君仗劍安三楚
不讓功名治郡時

送曹明府赴括蒼

相逢斗酒醉花前，舞罷那知是別筵。
客路論心何可罄，故人分手各淒然。
山城旅鴈時雙度，江浦征帆正獨懸。
君去嶺梅應併發，莫教消息到春傳。

贈諸生戴子雍還浦陽

十年車蓋舊交歡，千里旌旗意未闌。
往往共遊庭畔竹，時時同賦苑中蘭。
論心自恨孤蓬轉，念別重逢斗酒寬。
寶劍平生多所惜，獨知貽子不為難。

送何生遊河南

公子本多遊俠氣經過況是大梁城時時仗劍心先去
往往揮毫意獨橫過逢慷慨歌徒發戀別躊躇酒盡傾
若到夸門尋古道為余拭淚吊侯生

贈趙將軍鎮遼篇

遼海長城入塞中虎符單出遠臨戎不因邊騎千重突
誰識將軍百戰功目數黃沙心不分手調白羽氣偏雄
漢廷復道無名將獨取書生校射宮

送王龍阜給事北上

給舍郎官應紫微
况逢年少有光輝
春城曉日頻回馬
秋浦寒花欲照衣
蘭棹去從仙里別
寶刀翻指帝城歸
即登青瑣時簪筆
莫遣清朝諫疏稀

送張光祿赴南都

月卿征旆正臨秋
祖席清光夜欲流
楊柳堤邊三疊唱
芙蓉江上一孤舟
南中風物爭新詠
北固山河入壯遊
莫向樽前歌遠別
鶯聲依舊屬皇州

謁楚王祠

祠廟蒼蒼古水濱
英魂猶憶舊宮春
江山萬里非無楚
城闕千年別有秦
戰罷祇令身伏劍
歌殘空自淚沾巾
不知夾壘多豪士
本是將軍帳下人

將軍射林同莫膳部吳比部散步各成一首

羽衛閒花雜帳開
香塵遙藉馬蹄來
黃鸝逐客啼偏急
綠樹叅雲影亂迴
衣拂遊絲穿密徑
樽邀落日上層臺
應知對草三都賦
不讓穿楊百步才

贈王侍郎乃兄七十壽篇

白頭隱吏住清谿
天畔烟霞思欲迷
歌舞年華逢七十
綺羅樓閣是雙棲
諸賓上壽花當午
遠道傳觴月正西
借問長安書記發
應從柱史府中題

題趙清獻焚香圖送張兵憲

憲府排牙按五兵
身留關輔作長城
曾披鐵甲親衝陣
新起青樓欲望京
不分疆隅頻戰鬪
生憐俠客事橫行
夜分細語焚香拜
一點丹心本自明

題張華受劍圖寄朱兵憲

憲卿持節制龍沙萬里懸旌不顧家
手捲軍書常出塞身披法服早開衙
籌邊自結平原騎救世難迴下澤車
雷煥不妨為縣令曾將寶劍贈張華

答陳鳴野社友

十年赤縣頻為吏一疏中朝便落官
勞寄音書知夢在細籌世路念歸難
馬蹄最識邊沙苦鴈影猶驚塞月寒
詞客幸能憐旅况玉門應為賦生還

答朱允中

塞上何人為寄書遷臣一往隔年餘中原不是無臺諫
故國猶聞有敝廬剩水殘山偏入夢迴風積雪苦難居
白頭自愛長沙謫及問蒼生意轉紆

題桓公受胙圖寄史司丞

中丞匡合作三軍佐國勤王海內聞家築方城懷擁護
手提雄劍滅妖氛黃金結客麾如土白馬防川去若雲
霸業會看圖牒麗人臣萬里不忘君

贈劉都憲

大夫持節按元戎，千里山河在掌中。
心似旌懸勞衆庶，身如磬折攬英雄。
戟門夜絕黃金客，甲隊秋高白馬功。
擬斷天驕窺漢北，時將書疏達天聰。

攬鏡見白髮

五載遄陞便白頭，一生忠義向誰酬。
老同劉備羞髀肉，貧笑蘇秦嘆敝裘。
抗疏闕庭身萬死，悲歌京國淚雙流。
乾坤許大關心事，難聽書生一筆勾。

秋興四首

秋風曠蕩泛洪波客子悠悠思苦多鄉國別時饒景物
帝閭隔處是關河中原王氣占牛斗絕塞烟塵數素駝
憂世向來曾涕淚臨流誰復更滂沱

其二

八月西風商呂開玉關流調切徘徊懷鄉萬里懸明月
去國三秋怨落梅鐵馬金戈南北競珠簾綉闥禁庭迴
石潭芳藻垂綸處應有沉淪濟世才

其三

秋高日見鴈南飛
草色猶青宛馬肥
朝士幾時稱北伐
羈人且勿念東歸
虎狼得意偏穿徑
狐兔成羣正合圍
金馬玉堂多意氣
白頭還是擁朱衣

其四

荒城莽莽近邊陲
道上風塵羽檄遲
沙塞自懸千里鎮
漢庭誰賦四愁詩
關心老馬嫌秋早
送目征鴻訝夢遲
宇宙漫漫堪一笑
纓冠束帶欲何為

寄黃縣沈少府

分符花映海東川
繫鴈書迴塞北天
黃縣郎官清徹骨
白頭遷客懶於仙
宗家門第烟霞裏
帝里樓臺日月邊
同抱匡時千載恨
何時投筆勒燕然

遊金河寺賦此二首

巒嶂名山洞壑開
千年杖屨我重來
舊栽松栢今何處
曾跨鸞凰去不回
磴底流泉鳴玉磬
峯頭落葉結香臺
為憐寰海多塵土
欲訪巖阿濟世才

其二

山人學道隱名山來往盤陀水石間
拄杖風塵隨地起講堂香氣共雲閒
鉢羅樹老花仍在洞府仙遊鶴正還
應煉丹砂飛九鼎藥成不為駐朱顏

和李侍御行邊二首

聖皇馭宇輿圖遠御史乘邊節鉞高
驄馬蹄分千里月繡衣帶映百城壕
朝因獻納留霜簡野為巡行識羽毛
知道赤心懸社稷好令諸將學龍韜

其二

匡扶意與東溟潤忠義齊名北斗高
崑岳千尋方設壘黃河萬里是臨壕
盡聞沙草飛戈戟幸喜山花映節旄
明府若麾三尺劍野人當效六珠韜

首夏偕劉望洋同訪傳侍御草堂初成欣然命酌
柱史高筵並日開仙郎結綺拂塵來穿簾燕子翻棋局
隔岸桃花映酒杯詩就不殊鸚鵡賦樓成何讓鳳凰臺
風光滿座憐長夏不用方宵刻燭催

贈傅應臺中丞自江右移鎮關中二首

中丞仗鉞在荆揚重遣朱旗指朔方人望乖厓長守蜀
帝知充國銳凌羌先聲震疊凋輦鼓勝氣飄搖入太常
敬以一杯持遠餞會逢多士給壺漿

其二

秦中花鳥舊來那比歲春風半入河陞下宵衣西顧切
諸軍卧甲北征多應知赤舄能分陝不待樓船已伏波
慎勿輕馳太原卒邊人久唱隴西歌

送徐古石考滿

三年為宰在方城今日雙鳧赴北征
父老擁庭爭獻納吏民馳傳願留行
壺漿百道知恩在絃管千家是政成
臨發不須懸奏計蜚聲早已動神京

送張明府入覲

秦時郡府漢時官珥筆驅車此地難
獨有使君飛篆處不教郎吏竊符還
江山直與風猷並魚鳥猶知德澤寬
能使聲名媿劉寵千秋再選一錢看

送程烟溪赴魯邸

三年佐郡奏聲名今日離歌一劍橫
吳市門邊飛騎出若耶溪畔折花行
掄材稱作長沙傳綰綬遙臨不夜城
贈別未須傾斗酒寸心長逐片帆征

嶺山世壽曲贈少嶺譚憲伯

峨嶺山並極星懸長遣光輝甲第旋
四序玉樽歡綵服一堂華髮映朱筵
花邊舞影雙雙起葉畔歌聲疊疊連
解道丹丘即此地何須拔宅羨飛仙



青霞集卷六